

Cwnz Cauhyez: Daj Boux Hag Sawcuengh Bienqbaenz Boux Ndaem Youzcas Lai

□ Hoz Cunghveih sij Moz Beibei hoiz

De dwg boux hagseng maenhndei hag Sawcuengh ndeu, daj boux-dajgoeng, bouxcauhnieb daengz yinz-da daibyaj, ciuhvunz de itcig youq ranzmbanj, daiq vunzlai duet gungz bienq miz. De doiq cihsaw “Cuengh” gig miz gamjingz, “Boux-cuengh” “Mbanjcuengh” “Bawx Mbanjcuengh” daengj saw gapbaenz le gij hoenz giyez de. De caeuq sicangj caemh daiz cigboq gai huq, dawz gij doxgaiq daegsaek mbanjranz gai daengz daengx guek gak dieg bae. De couhdwg Gvangjsih Denzdungh Yen Bawx Mbanjcuengh Youzcas Mizhanh Gunghshw Cwnz Cauhyez.

“Mboujguenj Guh Gij Saeh Hung Roxnaeuz Iq, Cungj Aeu Lauxlaux Saed-saed Bae Guh”

Gaxgonq Cwnz Cauhyez youq Denzdungh Yen MinzcuZ Cunghyoz (diemjon' gyauq Cuengh Gun song vahsaw) doegsaw, seizde gij cingzcik Sawcuengh de gig ndei. 1993 nienz cuhcungh bizyez le, de mbouj laebdaeb doeg roengzbae lo, daengz bouqgairaeamxae ndaw cin daj-goeng, baez guh couh ndaej song bi.

1995 nienz, Cwnz Cauhyez baenzranz lo, gvaqlaeng, de gietdingh gag cauhnieb. NdaeJ daengz vunz ndaw ranz cihciz le, de bae gwnz haw Sozliengz Cin co aen bouq ndeu, cawx aen gihgi guhnae, gai raemxae, naediuz. Cwnz Cauhyez gaenx guh lauxsaed, canh ndaej di ngaenz.

“Boux Buet NdaeJ Ceiq Vaiq Mbouj Itdingh NdaeJ Guhbaenz, Hoeng Boux Itcig Buet Dingh NdaeJ”

Ngoenz ndeu, boux vunz he byaij haeuj aen bouq Cwnz Cauhyez, siengj caeuq Cwnz Cauhyez doxgap gai youzcas. De ok gihgi, Cwnz Cauhyez ok dieg, canh ndaeJ cienz bingzfaen. Cwnz Cauhyez gag naemj: Dieg ndaw bouq hoengqvatvat mbouj guh maz hix aeu hawj baenzlai cienzco, caeuq de caez guh, lij yinx ndaeJ vunz daeuj ndaw bouq cawx gijwnq, neix dwg aen gaicawx itdingh ndaeJ ngaenz. De mbouj ngeix lai, doq doengzeiq lo, Cwnz Cauhyez bi haenx couh faen ndaeJ geij cien maenz.

Raen songde canh cienz baenz-neix lai, bi daihngaih boux lauxbanj de couh deng caencik de rag bae gai youzcas. Cwnz Cauhyez mbouj doek-naiq, gietdingh gag guh gij gaicawx youzcas. Mbouj geij nanz, de caeuq ranzmeh ciq ndaeJ 7500 maenz cawx le aen gihgi caq youz ndeu, caiq cam



▲ Cwnz Cauhyez (boux baihsuix daih' it) youq dauzbauj cigboq gai huq.

baengzyoux ciq le song sam cien maenz daeuj cawx aen caizyouzgih he, aen ranzcaqyouz ndeu couh laebbaenz lo, doq ndaeJ hai hong caq youz.

Aenvih youzcas mbouj ndaeJ gwq caq, baezlaeng sam seiq bi, aen ranzcaqyouz Cwnz Cauhyez mbouj canh ndaeJ saekdi cienz, cij ndaeJ baengh gai naediuz caeuq huqcab gvaq ngoenz. Daengz bi daihhaj, de dem aen gihgi le gij seng'eiq cij menhmenh bienq ndei hwnjdaeuJ, ngoenz ndeu caq ndaeJ ok song dun youzcas. Aenvih gij youzcas de ndei caemhcaiQ de guh vunz ndei gangj lauxsaed, mbouj geij nanz gij youzcas de couh gai ndaeJ gig ndei lo.

Raen gij gyaq youzcas youq 2015 nienz moix gaen gai 20 maenz, daengz 2016 nienz hwnj daengz moix gaen 40 maenz, youzcas gai ndaeJ yied daeuj yied bengz, hoeng, gij vunz daeuj cawx cix yied daeuj yied lai. Seizneix, gij youzcas aen ranzcaqyouz Cwnz Cauhyez gaenq mbouj gaeuq gai lo, de hainduj ngeix daengz ngoenzlaeng.

“Gou Dwg Bouxcuengh, Maj Youq Mbanjcuengh, Ndigah Couh Heuhguh ‘Bawx Mbanjcuengh’”

2015 nienz, Cwnz Cauhyez youq Denzdungh Yen Nazbaz Cin laebbaenz le Gvangjsih Denzdungh Bawx Mbanjcuengh Youzcas Haifat Mizhanh Gunghshw, caemhcaiQ cawx dieg guh aen cangj caq youzcas, gvangq miz saek 10 moux. Seizneix gunghshw bi canjeiz miz 500 fanh maenz, dwg gij

gveihmoz ceiq hung, sezbei ceiq senhcin ndaw Denzdungh Yen. 2016 nienz, Cwnz Cauhyez vih gij canjbinj guh aen sanghbyauh heuhguh “Bawx Mbanjcuengh”.

“Vihmaz heuhguh ‘Bawx Mbanjcuengh ne?’ Gicej cam.

“Gou dwg Bouxcuengh, maj youq Mbanjcuengh, haq vunz le couhdwg bawx lo, ndigah couh heuhguh ‘Bawx Mbanjcuengh’ ha.” Cwnz Cauhyez angqvauvau naeuz.

2016 nienz, gij yienghbinj youzcas Bawx Mbanjcuengh soengq daengz Nanzningz genjcwz, cungj dwg gij biucinj it gaep, gij mingzdaeuz youzcas Bawx Mbanjcuengh menhmenh gyaq'gyawj cungj rox lo.

“Haemhneix 7 Diemj-cung, Sicangj Caeuq Mwngz Doxiu Youq Dauzbauj Cigboq Gai Huq”

4 nyied 16 hauh banhaet 7 diemj 11 faen, Cwnz Cauhyez youq ndaw baengzyouxgien veihsin de fat: “Haemhneix 7 diemj-cung, Baksak Si cangzvu fusicangj caeuq mwngz doxiu youq Dauzbauj cigboq gai huq, youzcas Bawx Mbanjcuengh youq gizneix caj mwngz!” Haemhhaenx 7 diemj daengz 9 daemj, Baksak Si cangzvu fusicangj Siz Gozvaiz caeuq Cwnz Cauhyez youq Dauzbauj caemh daiz cigboq gai youzcas Bawx Mbanjcuengh.

Haenqrengz le 4 bi, “Bawx Mbanjcuengh” gaenq baenz gij nungzcanjbinj ndei Baksak lo. 3

nyied 16 hauh, Denzdungh Yen Yinzminz Cwngfuj fuyencangj Se Yaujgangj hix youq Ginghamdungh cigboq bang gai gij youzcas Bawx Mbanjcuengh, caeuq vunzlai gaisau senhconz gij nungzcanjbinj miz daegsaek Denzdungh.

“NdaeJ Buenx Mwngz Byaij Daengz Giz Engq Gyaq, Cij Miz Ndangcangq”

Gij youzcas dwg gij youz doenghgo guek raeuz gag miz, dwg aeu ceh goyouzcas caq baenz. Goyouzcas youq Yizbwnj caeuq geij aen guekgya Dunghnanzya miz di ndwi, cij miz guek raeuz ndaem miz haujlai. Ndw youzcas hamz miz gij yenzsu sinh lai raeuh, beij youq ndaw youz duhhenj lij lai 10 boix; ndaw youzcas hamz miz lai cungj anhgihsonh, dwg sojmiz youz-gwn ndawde ceiq lai. CaemhcaiQ goyouzcas dwk vafeiz caeuq nungzyoz couh mbouj baenz mak lo, ndigah dwg gijgwn denhyenz, gig ancienz.

“NdaeJ buenx mwngz byaij daengz giz engq gyaq, cij miz ndangcangq.” Cwnz Cauhyez gangj. Gij suijbingz swngghoz vunzlai ngoenz doek ngoenz ndaeJ daezsang, caemhcaiQ miz engq lai vunz rox gij ndeicawq youzcas, de nyinhnaeuz doeklaeng gij youzcas itdingh yied gai yied ndei yied gai yied lai.

“Gou Cij Dwg Boux-guhnaz Ndeu, Cij Rox Guh Saedsaeh”

Cwnz Cauhyez guhbaenz lo, hoeng de mbouj lumz gyoengqvunz henz ndang lij caengz duet gungz gvaq. De dwg Denzdungh Yen yinzda daibyaj, itcig ngeix baenzlawz daiq vunzlai duet gungz bienq miz. Lai bi daeuj, de mboujdunh dawz gij ginghyen guhbaenz cauhnieb son hawj vunzlai, caemhcaiQ daiqlingx gyoengqvunz fatcaiz byaij hwnj roen siujgangh. De daiqdoengh le 55 hoh duet gungz bienq miz, caeuq 291 aen hozcozse, 600 lai hoh ciem le gij hezyi ndaem goyouzcas, aen giyez de ciengzgeiz miz 30 lai aen gangjvei ciu bouxguhnaz daeuj guhHong.

Seizneix, Denzdungh Yen ndaem goyouzcas aiq miz 46000 moux, ndaem youq Nazbaz Cin, Sozliengz Cin caeuq Yihih Cin 3 aen cin. Cwnz Cauhyez vih gij hong duet gungz Denzdungh Yen dem rengz haujlai.

“Gyoengq lingjdaui ndaw yienh heuh gou gangjgangj gij goj bonjfaenh, gou naeuz gou mbouj rox gangj, gou cij dwg bouxguhnaz ndeu, cij rox guh saedsaeh.” Cwnz Cauhyez giemhaw naeuz.